

Na osnovu uviđene potrebe, a u skladu sa članom 38. Statuta Sindikata trgovine i uslužnih djelatnosti Bosne i Hercegovine, Skupština STBIH donosi sljedeći

PRAVILNIK O JAVNOM NASTUPU ČLANOVA UPRAVNIH TIJELA STBIH

Član 1.

Ovim pravilnikom definišu se pravila javnog nastupa i javnog iznošenja stavova članova upravnih tijela STBIH, i to predsjednika i potpredsjednika STBIH, regionalnih povjerenika, područnih povjerenika, druge članove Upravnog odbora i komisija, predsjednika i regionalnih koordinatora sekcije mladih, te predsjednika/cu sekcije žena (u daljem tekstu: članovi upravnih tijela STBIH).

Član 2.

STBIH, u skladu sa članom 2. Statuta STBIH, čine “dobrovoljno učlanjeni radnici iz djelatnosti trgovine i uslužnih djelatnosti **svih nacionalnosti, političkih i vjerskih uvjerenja**, udruženi radi zaštite i unapređenja svojih općih, profesionalnih i ekonomskih interesa. **Sindikat je nezavisan od vlada, partija, vjerskih zajednica, uprave i poslodavaca.**“

Uzimajući u obzir gore navedeno, te činjenicu da je STBIH jedan od rijetkih sindikata koji djeluju na nivou Bosne i Hercegovine, veoma je važno da se svi članovi STBIH osjećaju integrisano i ravnopravno u svakom momentu, a članovi upravnih tijela STBIH imaju posebnu odgovornost u tom procesu. Član STBIH se ne smije osjećati diskriminisano zbog svog nacionalnog, političkog ili vjerskog uvjerenja.

Član 3.

U skladu sa članom 12. Statuta Sindikata trgovine i uslužnih djelatnosti, **svi članovi STBIH imaju obavezu da čuvaju ugled STBIH**. Stub čuvanja ugleda STBIH predstavljaju članovi upravnih tijela STBIH.

Član 4.

Kako je STBIH organizacija koja djeluje u cijeloj Bosni i Hercegovini i temelji se na osnovnim principima humanosti, apolitičnosti, inkluzivnosti i saradnje, članovima upravnih tijela zabranjuje se svako:

- veličanje ratnih zločinaca, vojnih i paravojnih formacija, te bilo kojih drugih lica i organizacija povezanih sa ratnim aktivnostima u BiH, a čije bi pominjanje moglo izazvati negativnu reakciju grupe članova STBIH;
- promovisanje organizacija i lica koje veličaju ideologije fašizma i onih koji su direktno i javno saradivali sa njima (primjer: Hitlerova nacistička stranka, Ustaše, Četnici i slično);
- afirmativno pisanje o vjerskim organizacijama sa radikalnim stavovima čije dovođenje u vezu sa STBIH može narušiti ugled STBIH (primer: Selefijski pokret u BiH, ISIS i slično);

- promovisanje drugih sindikata koji djeluju u Bosni i Hercegovini, a sa kojima STBIH nema saradnju (primjer: SSSBIH, PPDIVUT i slično);
- stalno promovisanje jedne političke stranke ili jednog kandidata (primjer: često objavljivanje promotivnog materijala jedne političke stranke ili kandidata tokom predizborne kampanje);
- pozivanje na mržnju i/ili nasilje prema bilo kojoj društvenoj skupini ili pojedincu;
- napad i vrijeđanje sindikalnih kolega i sindikalnog rukovodstva čime se ruši ugled STBIH;
- sve druge aktivnosti koje direktno narušavaju ugled STBIH.

PREDSTAVLJANJE STBIH

Član 5.

Kako bi se javnost što bolje informisala o aktivnostima STBIH, predsjednik/ca STBIH će određivati povjerenike i članove koji će davati izjave predstavnicima medija. Prije izjave, povjerenik ili član će se konsultovati sa predsjednikom/com STBIH u vezi sa sadržajem izjave.

Press konferencije će se sazivati kada za to postoji potreba i prije toga će predstavnici medija biti obavješteni o terminu održavanja konferencije i njenoj temi.

Član 6.

Uobičajeno, kontakte sa medijima održava tehnički sekretar i asistent predsjednika/ce iz glavne kancelarije, ali to mogu raditi i drugi povjerenici, predsjednici i koordinatori sekcija, po odobrenju predsjednika/ce STBIH.

Ukoliko postoji interes medija da članovi STBIH govore o određenoj temi, projektu i/ili problematici potrebno je o tome unaprijed informisati predsjednika/cu STBIH. Predsjednik/ca STBIH, ukoliko smatra da navedena radnja može narušiti ugled STBIH i/ili njegovih članova dužan je o tome obavijestiti člana. U tom slučaju, članu nije dozvoljeno da nastupa ispred STBIH i ima obavezu da određeni medij uputi na glavnu kancelariju STBIH.

Član 7.

Prilikom govorenja o nekoj temi, osoba govori u ime STBIH i tom prilikom ne iznosi lične stavove, nego stavove STBIH.

Ukoliko se radi o predstavljanju nekog događaja, potrebno je dodatno naglasiti ko je isti organizovao, gdje, kada, s kojim ciljem i šta je konkretno time postignuto. Ako je aktivnost organizovana u saradnji sa partnerima kojima se osoba želi zahvaliti, a kojih nema u unaprijed dostavljenom nacrtu aktivnosti, potrebna je saglasnost predsjednika/ce prije nego se osoba kao predstavnik STBIH javno zahvali drugom fizičkom ili pravnom licu, kako bi se izbjegla mogućnost dovođenja STBIH u vezu sa organizacijama koje mogu narušiti ugled STBIH.

Član 8.

Svi pozivi, obavijesti, saopštenja, plakati i materijali idu na usvajanje i odobravanje od strane predsjednika/ce STBiH kako bi se isti unaprijedili, provjerili i plasirali pravovremene, tačne i pouzdane informacije. Nije dozvoljeno plasirati bilo kakav javni poziv, poziv medijima, saopštenje ili poslati bilo koji materijal na štampanje, prije odobrenja od strane predsjednika/ce.

Sve javne obavijesti koje prethodno nisu odobrene od strane predsjednika/ce STBiH ne odražavaju javni stav STBiH. Svi isprintani materijali koji nisu prethodno odobreni od strane predsjednika/ce ne moraju biti plaćeni iz budžeta STBiH.

INFORMISANJE ČLANOVA STBIH

Član 9.

Osnovna sredstvena informisanja članova STBiH su web stranica www.stbih.ba i Facebook platforma, i to stranica *Sindikat radnika trgovine i uslužnih djelatnosti BiH* (u daljem tekstu: Facebook stranica) i grupa *Sindikat radnika trgovine BiH za dostojanstvo rada* (u daljem tekstu: Facebook grupa).

Sekcija mladih dodatno informiše svoje članove o aktivnostima Sekcije na posebnoj Facebook stranici *STBiH Youth*.

Član 10.

Moguće je, kao dio programskih aktivnosti, kreiranje novih Facebook stranica i grupa ukoliko za tim postoji stvarna potreba. Nije dozvoljeno kreiranje novih Facebook stranica i grupa bez prethodne saglasnosti predsjednika/ce STBiH.

Član 11.

Svi članovi upravnih tijela STBiH imaju obavezu da napišu kratke izvještaje o svim provedenim aktivnostima i zajedno sa prikladnim fotografijama isti objave u grupi *Sindikat radnike trgovine BiH za dostojanstvo rada*, u roku od 72 sata od provedene aktivnosti, kako bi članovi i donatori STBiH bili informisani o svim provedenim aktivnostima. Izuzimaju se posebne aktivnosti koje zbog svoje prirode ne mogu biti predstavljene široj javnosti.

Predsjednik/ca STBiH će navedenu objavu pregledati u razumljivom roku. Nakon toga, predsjednik/ca odobrava objavu ili traži modifikaciju objave ukoliko u njoj uvidi netačne informacije, neprimjerene fotografije, gramatičke i druge greške, te ukoliko smatra da će navedena objava narušiti ugled STBiH, izazvati nemir među članovima i sl.

Nakon što je objava odobrena od strane predsjednika/ce, članovi upravnih tijela STBIH mogu objavu podijeliti na privatni profil, komentarisati i slično, kako bi što više članova (i potencijalnih članova) vidjelo navedenu objavu.

Član 12.

Prilikom kreiranja objave treba koristiti jednostavan i svima razumljiv jezik, uz posebnu pažnju na gramatiku i pravopis. Objava treba sadržavati sve neophodne informacije – Šta se desilo? Kada? Gdje? Zašto? Ko je za to odgovoran? Objava treba biti kreativna, mora sadržavati tekst, primjerenu fotografiju ili više fotografija.

Ukoliko je tema objave događaj organizovan u okviru projekta finansiranog od strane donatora, zahvalnica donatoru u vidu jedne rečenice na kraju objave je dobrodošla. Ukoliko osoba koja piše objavu govori engleski jezik, poželjno je, poslije teksta na našem jeziku dodati kratki tekst sa najneophodnijim informacijama na engleskom jeziku, budući da grupu aktivno prate i ljudi van BiH.

PRAVILA KOMENTARISANJA UNUTAR GRUPE

Član 13.

Od članova upravnih tijela STBIH očekuje se da aktivno prate i komentarišu objave u Facebook grupi i na Facebook stranici. Objave sa većim brojem sviđanja i komentara će se duže prikazivati publici na početnoj stranici prilikom ulaska na platformu Facebook i time će dostići veći domet.

Prilikom komentarisanja objava u Facebook grupi, treba koristiti afirmativne fraze koje će sugerirati drugim članovima da je nešto što je urađeno dobro i za dobrobit svih članova STBIH. Zabranjuje se svaki negativni komentar članova upravnih tijela STBIH, budući da članovi upravnih tijela STBIH podnose prijedloge i primjedbe unutar svojih upravnih tijela na jasno definisan način (npr. ukoliko sindikalni povjerenik smatra da nešto na Facebook grupi nije primjereno, komentarišaće to sa članovima UO ili predsjednikom/com, a NE javno).

Član 14.

Ukoliko objavu komentariše član grupe u kojem direktno proziva STBIH, predsjednika/cu STBIH, nekog od drugih članova upravnih tijela STBIH i sl, potrebno je odgovoriti na komentare, a tom prilikom obratiti posebnu pažnju da odgovor sadrži konkretnu argumentaciju, linkove koji će potkrijepiti komentar/argument i/ili kontakte na koje se član treba javiti ukoliko želi da neki konkretan problem riješi na adekvatan način.

Administratori Facebook grupe će isključiti iz grupe sve koji nisu članovi STBIH, a aktivni su u pisanju negativnih, neargumentovanih i huškačkih komentara u grupi, koji za cilj imaju narušavanje ugleda STBIH među članovima STBIH.

OSTALA PRAVILA KORIŠTENJA DRUŠTVENIH MREŽA

Član 15.

Budući da je Facebook, pored medija i sindikalnih povjerenika, osnovni način informisanja članova STBIH, a članovi upravnih tijela informacije prenose sa svojih ličnih profila, stojeći iza profila imenom i prezimenom – koje se najčešće spominje u pravnim aktima STBIH, odredbe iz člana 4. ovog pravilnika se odnose i na objave i komentare na privatnim profilima, kao i javne komentare na društvenim mrežama.

PRIJELAZNE I ZAVRŠNE ODREDBE

Član 16.

Predsjednik/ca STBIH zadužen je za provedbu ovog Pravilnika, a Upravni odbor i Statutarna komisija donose odluke o poduzimanju mjera, uključujući i mjeru isključenja.

Član 17.

Pravilnik se na sve osobe iz člana 1. odnosi jednako, a stupa na snagu od dana donošenja.